

Akta baru bangun Kg Baru ke Parlimen bulan depan
The Malaysian Insider
17 September , 2011

KUALA LUMPUR, 17 Sept — Rang Undang-Undang Perbadanan Kampung Baru yang tertangguh tiga kali sebelum ini akan dibawa ke Parlimen pada sesi yang bermula bulan depan bagi membolehkan pembangunan dilakukan di kawasan itu.

Menteri Wilayah Persekutuan dan Kesejahteraan Bandar Datuk Raja Nong Chik Raja Zainal Abidin (gambar) berkata, input dalam rang undang-undang itu antara lain adalah daripada perbincangan mendalam dengan beberapa pihak termasuk badan bukan kerajaan, pemilik dan waris tanah di kawasan itu.

“Ia selaras dengan hasrat kerajaan dan para pemilik serta waris tanah untuk melihat kawasan penempatan Melayu yang strategik dan bersejarah itu dibangunkan ke tahap maju dan menguntungkan, sesuai dengan kedudukannya di tengah-tengah bandar raya Kuala Lumpur,” kata beliau selepas menghadiri sambutan Merdeka Raya anjuran Umno Titiwangsa di Kampung Baru hari ini.

Dipetik Bernama Online, beliau berkata, pihak Peguam Negara juga meneliti rang undang-undang tersebut tanpa membelakangkan pandangan daripada pihak-pihak berkepentingan di kawasan penempatan eksklusif orang Melayu itu.

Raja Nong Chik berkata dengan adanya akta khusus bagi pembangunan Kampung Baru, ia akan membawa kawasan itu setanding dengan lain-lain kawasan yang pesat membangun di bandar raya ini.

Rang undang-undang itu sepatutnya dibahaskan semula di Parlimen pada sesi Jun lalu.

Bagaimanapun pada akhir Jun lalu, majlis pentadbir Kampung Baru meminta Putrajaya agar menangguhkan bacaan kali kedua Rang Undang-undang Perbadanan Kampong Baru 2010 memandangkan respons ke atas referendum melibatkan pemilik tanah eksekutif orang Melayu itu dingin.

Menurut Setiausaha Kehormat Lembaga Pentadbir Penempatan Pertanian Melayu (MAS) Shamsuri Suradi, pihaknya belum menerima keseluruhan borang referendum yang dihantar kepada pemilik dan pewaris tanah untuk membuat keputusan.

Ketika itu, The Malaysian Insider difahamkan hanya sekitar 30 peratus borang referendum telah diperolehi kembali.

Rang undang-undang itu dibawa ke Dewan Rakyat pada 14 Disember lalu untuk bacaan kali pertama bagi membolehkan penubuhan sebuah perbadanan yang bertanggungjawab merancang dan mengawal selia pembangunan Kampung Baru.

Bagaimanapun bacaan kali kedua yang dijadual pada Mac lalu ditangguhkan sehingga Jun bagi membolehkan beberapa klausa diperhalusi ekoran bantahan yang dikemukakan pemilik dan pewaris tanah.

Source: <http://www.themalaysianinsider.com/bahasa/article/akta-baru-bangunkan-kg-baru-ke-parlimen-bulan-depan/>